

VENDIM
Nr.206, datë 30.6.2011

MBI MIRATIMIN E NDRYSHIMEVE NË LICENCËN E SUBJEKTIT TELEVIZIV PRIVAT
KABLLOR “TV POJAN”

Këshilli Kombëtar i Radios dhe Televizionit, i përbërë nga:

Endira Bushati	kryetare
Alban Karapici	zëvendëskryetar
Suela Musta	anëtare
Sami Neza	anëtar
Gent Ibrahim	anëtar (në mungesë)
Zylyftar Bregu	anëtar,

pasi mori në shqyrtim çështjen me:

OBJEKT: Për shqyrtimin e njoftimit të paraqitur nga z.Haki Trakalaçi, për ndryshimet e ndodhura në licencën e televizionit privat kabllor “Tv Pojan”.

BAZA LIGJORE: Neni 7 pika 21, neni 22 dhe neni 30 i ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar,

VËREN SE:

KKRT-ja, me vendimin nr.831, datë 24.4.2009, ka licencuar subjektin person fizik z. Haki Trakalaçi, për televizionin privat kabllor “Tv Pojan”, duke u autorizuar të funksionojë si operator televiziv privat kabllor për një periudhë prej 6 vjetësh, për të penetruar me sinjal në komunën Dërmenas.

Në datën 20.6.2011, z. Haki Trakalaçi ka depozituar pranë KKRT-së njoftimin për ndryshimet e ndodhura në subjektin televiziv privat kabllor “Tv Pojan”, duke kërkuar miratimin e tyre nga KKRT-ja.

Konkretisht subjekti shprehet se:

“...në datën 6.6.2011 jemi paraqitur para noterit në qytetin e Fierit dhe kemi deklaruar se jemi dakord që këtë aktivitet me të gjitha pajisjet e tij, duke përfshirë sistemimin kabllor, si dhe pajisjet në studio përkatëse, unë Haki Trakalaçi t'i kaloj në pronësi të dhëndrit tim, z.Emin Grenica dhe të bashkëpunojë me përvojën time për përmbushjen e të gjitha detyrimeve në aktivitetin e transmetimit kabllor sipas licencës së KKRT-së.

Për sa më sipër, kreu regjistrimit në QKR dhe rrjedhimisht edhe ndryshimin e NIPT-it. Ekstraktin e regjistrimit tregtar të subjektit Emin Grenica, me fushë të veprimtarisë “Televizion kabllor lokal” dhe një certifikatë regjistrimi të personit fizik të tatueshëm me nr.identifikimi L12721403G, po e paraqesim bashkëngjitur.

Në mbështetje të nenit 22 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar: licenca e transmetimit është e patjetërsueshme dhe vlen vetëm për subjektin të cilit i është dhënë. Në rast se mbajtësi i licencës hyn në marrëdhënie juridike civile, objekt i të cilave është veprimtaria radiotelevizive e licencuar, atëherë për cedimin ose kalimin e të drejtave që burojnë nga licenca kërkohet miratimi i Këshillit Kombëtar të Radios dhe Televizionit. Subjektit që ka fituar këto të drejta miratimi i jepet në formën e një licence të re me të njëjtën përmbajtje. Kur këshilli nuk e miraton kalimin për shkaqe të parashikuara në këtë ligj, i ofron frekuencat që i përkasin kësaj licence për një konkurrim të ri kandidaturash”.

Në rastin konkret, z.Haki Trakalaçi, i licencuar si person fizik nga KKRT-ja, i ka shitur z.Emin Grenica, aktivitetin e televizionit kabllor privat “Tv Pojan”, dhe për kalimin e të drejtave që burojnë nga licenca kërkohet miratimi nga ana e KKRT-së.

Në mbështetje të nenit 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, “I licencuari detyrohet të njoftojë Këshillin Kombëtar të Radios dhe Televizionit për çdo ndryshim të të dhënave që ka paraqitur në kërkesën për marrjen e licencës... dhe arsyet përkatëse, paraprakisht dhe në çdo rast, jo më vonë se 15 ditë pas bërjes së këtyre ndryshimeve...”.

Subjekti, në bazë të nenit të sipërcituar, ka dërguar pranë KKRT-së shkresën me ndryshimet e ndodhura në operatorin televiziv privat kabllor “Tv Pojan”, duke respektuar afatin ligjor, si dhe duke shprehur arsyet e bërjes së këtyre ndryshimeve. Konkretisht subjekti është shprehur se “...duke marrë parasysh punët e mëdha, moshën time, por edhe problemet familjare të kohëve të fundit, u detyrova të kërkoja bashkëpunimin me partner të tjerë, e të përballonim administrimin korrekt të këtij subjekti kabllor. Kjo më detyron që së bashku me z.Emin Grenica, i afërm i familjes sime, i njohur prej meje, të bashkëpunonim për ruajtjen e investimeve të tjera”.

Sa më sipër, KKRT-ja e gjen të drejtë e të mbështetur kërkesën e subjektit.

PËR KËTO ARSYE,

Këshilli Kombëtar i Radios dhe Televizionit, në mbështetje të nenit 7 pika 21, nenit 22 dhe nenit 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar,

VENDOSI:

1. T'i heqë personit fizik z.Haki Trakalaçi, licencën për televizionin privat kabllor "Tv Pojan".
 2. Licenca nr.069/RTV kabllor bëhet e pavlefshme.
 3. T'i japë personit fizik z.Emin Grenica, licencë me afat vlefshmërie sipas përcaktimit në licencën nr.069/RTV kabllor, duke e autorizuar të funksionojë si operator televiziv privat kabllor për të penetruar me sinjal në komunën Dermenas.
 4. Licenca e re ka të njëjtën përmbajtje me licencën nr.069/RTV kabllor lidhur me kushtet e licencës, ku përfshihen: struktura programore, zona e penetrimit, kushtet teknike dhe tarifat.
 5. Ngarkohet administrata e KKRT-së për kryerjen e veprimeve të mëtejshme në zbatim të këtij vendimi.
- Ky vendim hyn në fuqi menjëherë dhe botohet në Fletoren Zyrtare.

KRYETARE
Endira Bushati